

Scéal, Scéal, Scéal...

Scéilíní, nuaíocht agus fógraí
as Cois Fharraige

Instagram: @pleanteangachaisfharraige
Twitter: @PleanTeangaCF
Facebook: @PleanáilTeangaChoisFharraige

01 DEIREADH FOMHAIR 2020



Ó HÉALAI: Ó NEART GO NEART

Tá Dónall Ó Héalaí as na hAille in Indreabhán a bhfuil ainmniúchán IFTA faighte aige don phríomhaisteoir is fearr mar gheall ar á pháirt in Arracht, ainmnithe ar liosta "Stars of Tomorrow" na hirise *Screen International*, a thugann aitheantas d'aisteoirí sa mBreatain agus in Éirinn a bhfuil an-ghealladh fúthu. Roinn an t-aisteoir an dea-scéal ar na meáin shóisialta le deireanaí. Tá ardmholadh á thabhairt do shaothar Dhónaill le fada agus bronnadh gradam Aer Lingus Discovery air ag Féile Scannán Idirnáisiúnta Bhaile Átha Cliath níos luaithe i mbliana. Tá muid bródúil asat i gCois Fharraige a Dhónaill, le gradaim nó gan gradaim!



COMHGHAIRDEACHAS LE ROTHAITHE CHOIS FHARRAIGE

Comhghairdeachas le Brian Mac Donncha agus Fáinse Ní Chéidigh a ghlac páirt i Rothaí na Gaeltachta le gairid. Do rogha aistear a dhéanamh agus idir 10-100km a chlúdaigh ar do bhealach i rith deireadh seachtaine amháin an dúshlán a bhí le comhlíonadh. Thaisteal Brian 108km taobh istigh de cheithre uair go leith. D'éirigh lena chomhghleacaí Fáinse 102km a dhéanamh taobh istigh den am céanna. Tá éacht déanta ag na rothaithe seo ar son Chois Fharraige! Maith sibh a chairde!

SEIMINEÁIR AN FHÓMHAIR Ó GHAELOIDEACHAIS

D'fhógair Gaeloideachas a gClár Seimineáir don Fhómhar ar líne, le deireanaí. Clúdaíonn na seimineáir topaicí éagsúla ó Ghaeilge na Sraithe Sóisearaí, Riachtanais Speisialta Oideachais agus Fóineolaíocht agus Litearthacht go Léitheoireacht sna hArdranganna. Beidh na ceardlanna á seachadadh ar Zúm i mbliana. Beidh na ceardlanna an-áisiúil do mhúinteoirí agus dóibh siúd atá ag obair i réimse an oideachais go háirithe. Le clárú, nó le tuilleadh eolais a fháil, téigh chuig www.gaeloideachas.ie. Tá eolas le fáil freisin ar chuntas Facebook: Gaeloideachas.



NA BUGAÍ BEOGA

Tá Tuismitheoirí na Gaeltachta ag eagrú Na Bugaí Beoga chuile mhaidin Chéadaoine ag 9:30 r.n. Casfar le chéile in ionad Splanc ar an gCeathrú Rua sula dtosófar! Is seisiún aclaíochta é seo a thugann deis do Mhama/Deaide/duine fásta dreas traenála a dhéanamh le bugaí i gcomhlúadar a chéile. Is féidir níos mó eolais a fháil agus clárú ag aisling@tuismitheoiri.ie



CLUB SCANNÁN SAILEARNA AR AIS!

Cuirfear tús le séasúr nua Chlub Scannán Sailearna ar an 8 Deireadh Fómhair, leis an scannán iomráiteach ón bhFrainc *Portrait of a Lady on Fire*, atá suite sa mBriotáin le linn deireadh an 18ú aois. Beidh scannán le feiceáil chuile oíche Déardaoin ag tosú ag 8.15i.n ar an scáileán mór san Amharclann i Seanscoil Sailearna. Taispeánfar 10 scannán ar fad i dteangacha éagsúla, le fotheidil i mBéarla. De bharr srianta sláinte Chovid-19, ní ghlacfar ach le 30 ball sa gclub an séasúr seo, le scaradh sóisialta a chur i bhfeidhm san amharclann. Is ar líne amháin atá ballraíocht ar fáil ag www.clubscannan.ie. Tá tuilleadh eolais le fáil ann freisin faoi na scannáin a bheas á dtaispeáint idir seo agus an Nollaig nó is féidir scríobh chuig clubscannan@gmail.com



CLUB SCANNÁN
SAILEARNA

COMÓRTAS TALLAINE AR LÍNE

Tá comórtas tallaine ar líne, trí mheán na Gaeilge, á reáchtáil ag Cumann na bhFiann i gcomhar le Foras na Gaeilge. Iarrtar ar dhaoine óga idir 9-12 iarratas a dhéanamh roimh an Déardaoin 8 Deireadh Fómhair. Beidh duais ar fáil don chéad, dara agus tríú háit! Is féidir tuilleadh eolais a fháil ag www.cnb.ie Go n-éirí go geal libh, a chairde!